

四庫全書

集部

欽定四庫全書

宛陵集卷三十一

宋 梅堯臣 撰

杜挺之贈端溪圓硯

雪壓古寺深中有卧病客訪之語久清飢馬齧庭柏案
頭蠻溪硯其狀若圓璧指此欲爲贈而將助吟席非意
予敢貪既拒頗不懌大出楮中有素許當自擇強持慰
勤心歸以示朋戚哂曰豈其然為汲寒泉滌滌彼偽飾
物紙乾見頑石清晨走顙奴無厭願求易拜賜遂如初

明月懷吞蝕微分鸛目瑩尚清墨花碧詞荅謂我愚復
悔料已逆明日未央朝執手笑啞啞

吳仲卿示和韓持國詩一卷輒以為謝

葉公所好者熟以識頭角一日真物來駭汗沛且渥我
初見韓子蜿蜒噴雷電子復蛟龍文氣象不可捉畏懷
但驚顧得與前事較

新息重脩孔子廟記

新息古邑也自漢以來幾因亂而孔子之廟歲享不絕

于今雖邑宰有賢否祀典繫國家也儻不賢屋隳不葺有矣祀其廢諸慶歷七年清河張君伸為是邑始勤於治民謹於條約恪於事上既而民信訟且簡乃脩孔子祠及祭器予未知君之果學邪學而果知道邪以斯舉則君似有本者學者未必信奉如之嗚呼孔子之道與天地久與日月昭一郡一邑之廟不足以光顯厥德報厥功也略究為郡邑之人少誦其書長就其藝遂得其祿忍負不為一出口之勞究其廟至使瓦墮簷風雨壞

桷甍跛階塵昏像犬豕穴牆垣往來其間哉新之無是
患庶幾賢已然則苟因為利廣爾宮俾不肖有說非予
望於君也況邑隸蔡守吳公輔臣大儒名重天下聞君
能是得不樂邪予思昔忝邑時見邑多不本朝廷祭法
往往用巫祝於傍曰牛馬其肥癯疫其銷穀麥其豐瀆
悖為甚予即革之君觀有若是者當改為以從著式云

范景仁席中賦葡萄

朱盤何累累紫乳封霜厚今為馬谷餘昔釀梁州酒乃

知西土珍漢使傳應久

夜聽鄰家唱

夜中未成寐鄰歌聞所稀想像朱脣動髣髴梁塵飛誤
節應偷笑竊聽起披衣披衣曲已終窻月存餘暉

宋次道得廣南金橘為餉且有詩因和酬

越橘如金丸爛然已盈筐誰傳嶺外信尚帶霜前葉莫
嫌道路遠得與樽俎接主人無吝心懷歸予敢輒

李廷老席上送韓持國歸許昌得早字

馬蹄踐霜華遊客歸何早重裘不畏寒况復非遠道誰
言未顧期登第鬢如葆解裝喜可知月下金壺倒

送韓持國

曰予非才敏乃與世寡游三四洛陽友過半已成邱晚
節五六人文行皆潔脩韓氏棣萼盛於我為薰蕕君比
衆最篤我唱君非酬昔我竹軒下破窻風颭颭君時不
厭過逍遙談未休頗為俗士憎恬不防吝尤邇來我還
都君亦辭舊州舊州君所隱安得此久留雪晴命駕歸

使我生悲愁誰見淚水上定更不驚鷗

遲月

遲月月已上清光在高木未能照我庭團團隔東屋

風笛

既殊出塞聲還非江上聽夜吹送悠揚高樓月方迴

霜鐘

昔向寒溪卧遠寺撞白雲今也趨早朝殘月馬上聞

鳴琴

雖傳古人聲不識古人意古人今已遠悲哉廣陵思

和曹光道詠直廬屏中六鶴

漢家為瑞雙黃鵠只道飛翻太液池不似雲屏六畫鶴
帝宮深處有人知

晚歸聞韓子華見訪

門外多車騎後迹亂前蹤誰識此來過塵蹄重復重歸
有野僕言恨不故人逢豈無肴酒設所向乖所從未能
一往見嬾拙其必容

送丹陽新守李國博歸洪州

寬

蔡水冬不枯唯愁夜冰結歸船及暖下窮臘未飛雪淮
潁地漸偏川上雲常泄幾日接春波南風楚江徹拜親
懷郡章予慕嗟才劣

食薺

世羞食薺貧食薺我所甘適見採薺人自出國門南土
蠹瘦鐵刀霜亂青竹籃攜持入凍地挑以根葉參手龜
不自飽食此尚可慙肥羔朱尾魚腥羶徒爾貪

甘陵亂

甘陵兵亂百物灰火光屬天聲如雷雷聲三日屋瓦摧
殺人不問嬰與孩守官迸走藏浮埃後日稍稍官軍來
圍城幾匝如重鎗萬甲雪色停皚皚孰敢專輒但取裁
黃土始堅難速頽

夜飲席上賦松子

風松有霜子吹落幽人庭幽人畏狼籍日埽出巖扃誰
將稱遠物乃信涉滄溟

送李審言殿丞歸河陽

大河冬合時上可馳車馬子歸從橋安黃流在冰下況
命使於家其美世為寡是宜飭以行慰此懷慕者

送王宗說寺丞歸南京

晏歲欲飛雪滿天含凍雲犯寒單騎速獵吹紫裘薰庭
鵲還先喜池鴻去始聞公因問貧賤善說莫如君

李審言將歸河陽值雪遺金波酒

朔吹卷天吼遠郊無鳥飛忽驚開戶白昨夜打窗微聞

欽定四定全書

宛陵集
卷三十一

巷我方嬾關山君獨歸翻能寄醇酎為此解寒威

對雪憶往歲錢塘西湖訪林逋三首

昔乘野艇向湖上泊岸去尋高士初折竹壓籬曾礙過
却穿松下到茅廬

旋燒枯栗衣猶濕去愛峰前有徑開日暮更寒歸欲嬾
無端撩亂入船來

樵童野犬迎人後山葛棠梨案酒時不畏尖風吹入牖
更教牀畔覓鴟夷

元日朝

萬國諸侯振玉珂
踏雲朝會雪初過
欲聞鳳管天邊度
數聽雞人樓上歌
放杖旌旗方偃亞
迴頭宮闕更嵯峨
謬陪王屬曾何補
泛泛慙同上下波

答祖擇之遺新羅墨

海上老松死
霹靂燒瘦龍
胡人犀皮膠
團煤煙膏濃
色奪陽鳥翅
來涉溟渤重
君獲乃為贈
我謬蟲鳥蹤
且作異土玩
不媿西域筇

對殘雪懷歐陽永叔

窮臘一尺雪跨春氣逾嚴童僕苦病疥庭戶無與杙日
消夜復凍霰積泥相醺嬾出獨懷遠何由寄江帆

寄題時上人碧雲堂

望望佳人來未來雲已暮當時千里恨不獨看雲故何
此啓虛堂定知迎秀句還會古人心古人非特賦

和宋中道元夕二首

結山當衢面九門華燈滿國月半昏春泥踏盡游人繁

鳴蹕下天歌吹喧深坊靜曲走車轅爭前鬪盛亡卑尊
靚妝麗服何柔溫交觀互視各吐吞摩肩一過難久存
眼尾一笑迷精魂貂裘比比王侯孫夜闌鞍馬相馳奔
春風來解吹殘雪燈燭迎陽萬戶燃竟看鯨星在平地
不妨明月滿中天赭袍已向端門御仙曲初聞法部傳
車馬不閑通曙色康莊時見拾珠鈿

李國博遺浙薑建茗

吳薑漬吳糟越茗苞越擇咀辛聊案杯吸味可奴酪但

拜故人貺何言為物薄我心易厭足不比填窮壑

送臨江府令

昨從桃源還却向竟陵去今作中州官山水不曾飫且
當傳竹枝莫學乘籃輦雲木杜鵑時千巖響行處

寄題滁州醉翁亭

琅邪谷口泉分流漾山翠使君愛泉清每來泉上醉醉
纓濯潺湲醉吟異憔悴日暮使君歸野老紛紛至但留
山鳥啼與伴松間吹借問結廬何使君游息地借問醉

者何使君閒適意借問鐫者何使君自為記使君能若
此吾詩不言刺

戊子正月二十六日夜夢

自我再婚來二年不入夢昨宵見顏色中夕生悲痛暗
燈露微明寂寂照梁棟無端打窗雪更被狂風送

賜緋魚

蹉跎四十七腰間始懸魚缺袍雖可覺髮短齒已疎兒
女眼未識競來牽人裾不知外朝衆君恩慙有餘

和荅韓子華餉子魚

南方海物難具名子魚珍美無與并完鱗全乙異臭腥
素鹽漬曝生花輕其頭戢戢筠篋盈出自通印時所評
遠涉川陸來都城親賓交遺已見情食指嘗動吾竊驚
果獲異味亦足明

和荅韓奉禮餉荔枝

韓盛人所希四海饋名物韓復未疎予分珍曾不一蒲
陽荔子乾皺殼紅釘密存甘尚可嘉本味固已失遙思

海樹餘帶露摘初日安得穆王駿能置萬里疾

閏正月二日夜張氏納婦

太素子

婚姻覺及時周有標梅詩雪後花將發人歸室且宜坐
中傳漏鼓戶外轉星旗環佩遙聞出當脩廟見儀

酌別謝通微判官兼懷歐陽永叔

識君童穉時而今君齒壯不見二十年顏貌已非向親
戚多零落欲語還悲愴更問平生交久從滁水上君又
滁水歸寄音傾桂釀儻復二十年吾焉保無恙

和永叔郡齋聞百舌

響舌能令百鳥羞聽時丹杏發山郵春雲不定雨來急
濕翅蒼茫高樹頭

送陶太博通判廣信軍

平時易水頭不復起邊愁壯士去來久寒波空自流臨
塘遺鷺羽隔戍見羶裘半似江南美軍和賸燕游

答王太祝卷

整

朝迴泥塗不可出飢馬倦僕驅之頑閉門獨與古人語

黃卷未終聞扣關賢哉公族肯來顧詩袖大篇令我刪
珠光玉瑩絕瑕類強欲指摘徒羞顏自同培塿最淺狹
安得與子論丘山

雨賦

春雨之至兮風呵而雲導在上為膏在塗為淖被末漸
本潤萬物者歟施及天下不收報者歟入波而隨流因
積而成潦專好而失道者歟壞瓦漏屋蒸菌出木過而
為酷者歟朝使人愁夜使鬼哭迷而不知復者歟將告

之雨雨無聽也將告之天天且覓也窮居知命是何病也噫

送張太博通判袁州

君非身尤謫南州南方尚鬼其俗媮蛇為鄰虎為陬丹
茅苦竹深幽幽邑人祠鬼拜古樹竹杯一仰來烹牛牛
死齧慢常不幸誰得禁止專鉏鉤借曰未信君且往民
將語怪君聽不仰山頭有行舟

依韻和宋中道雨夜

暗驚料峭寒春雪兼春雨知勝早朝人
開眠不開戶邱壑豈無容泥塗還自取
誰吟何遜詩不覺逢逢鼓

讀裴如晦萬里集書其後

君自萬里迴遂成萬里集其詩二百篇文字必已立定
應侔前人未嘗有蹈襲古溪蠻鐵刀出冢土花澀誰將
飾以玉鐔上光熠熠宋子序其端精悍孰鉗繫搜新造
空蒙俗眼不得入示予要賦之短戈慙後執

見胥平叔

歷君門兮九重雲黝黝兮欲雨隱翠幕兮觀予心眷眷
兮不語

宣麻

彬美下一國曾無相印酬莫驚除拜峻自是戰功優壯
士頗知勇諸儒方覺謀淮西封亦薄裴度死生羞

朧月

夜晴初見月雲薄未分明高樹尚無影遠鴻時有聲下
階嫌履濕閉戶認苔生寂寂牆陰暝更長已漸傾

兵

太平無戰陣漢卒久生驕金甲不曾探犀弓應自調嗟
為燎原火終作覆巢巢若使威刑立三軍豈敢踞

泥

一夜添春雨中衢長舊泥屐黏憂折齒馬滑畏顛蹄去
啄從江鶴相呼任竹雞朝來放朝請始與逸人齊

聞韓仲文使歸

傳道使車迴柳條黃未開曉寒非絕漠春色近章臺名

馬北方至賓鴻南國來明朝齋祓見天子始稱才

未晴

未晴初止雨蒸潤尚侵衣缺月如羞出荒雲不肯歸
杏花朱欲綻梅萼雪將稀遠鴈來何急衝風濕翅飛

夜陰

月色明還暗雲寒散復濃古堂移翹翹積霧合蛟龍
濕菌飛螢出蒼苔上朽重獨吟嗟向老氣澀覺偏慵

夜晴

新晴月正明頻聽夜烏驚未向高枝穩時為繞樹聲羣
飛自紛泊衆鳥不屏營躁靜於焉見誰能度物情

古鑑

古鑑得荒冢土花全未磨背凌尖尚在鼻獸角微訛月
暗蝦蟇蝕塵昏魍魎過但令光彩發表裏是山河

索駝

鳴駝出西域銜尾自連連漢驛凌雲去邊人踏雪牽常
時識風候過漬辨沙泉老覺肉封側猶蒙錦帕鮮

李庭老許遺結絲勒帛

紉絲作長帶正勝茱萸紋冉冉仍垂緋
綵綵自有薰鮮華非稱我修飾未如君曾不日來取賢哉知禮云

貧

生甘類原憲死不學陶朱但樂詩書在未憂鐘鼎無恥
隨波上下難免鬼歔歔陋巷曲肱者終朝還似愚

行僧

風衣何揭揭有若瓠葉翻塵土不遠去白雲藏石門



宛陵集卷三十一

欽定四庫全書

集部

宛陵集卷三十二至

詳校官庶吉士

臣張溥

檢討臣何思鈞覆勘

覆校官博士

臣

劉光第

校對官主簿

臣

汪日贊

謄錄舉人

臣

張光熙

欽定四庫全書

宛陵集卷三十二

宋 梅堯臣 撰

送范景仁學士歸蜀焚黃

蒼山過秦梁山盡見川陸下馬古成都訪壘得喬木埽
籜開奠席隕淚濕俎肉當時相如歸徒自盛車轂不聞
有是為事乃今古獨還因問耆舊亦莫遺隱卜荒祠古
柏下殘月杜鵑哭憑君約史筆書作西來目

送宋中道鄭州拜埽

酣酣道傍杏戢戢壟上柏不知煙火禁但感風露易開
關埽墓隧向樹繫車軌灑淚有餘悲麒麟高幾尺

送韓子華歸許昌

不值風雨暴杏過梨已開社後清明前燕與人歸來湖
中水方漫誰共泛其隈儻有問顓顓顓未忘杯

燕

涎涎隻來燕飛飛自舞空輕如漢家后斜避楚臺風斗
折撩沙觜相高接草蟲向人全不畏切莫入吳宮

送周衍長官知遼州

二月遼陽去遼陽草未生春風吹邊沙卷起黃雲平土
人耕耨晚種黍何時成塞地寒且薄百役子宜輕

寒食

墳冢徧青山高低占原谷向來路已荒今迷問樵牧涉
水到雲林隔岡聞近哭沃酒白楊下悲風何颼颼雨止
梨園殘鳩聲在茅屋

依韻和太祝同諸君遊園湖見寄

陽春何處來客自商邱至一唱新詞工始見故人意園
林誰與遊卉木欣已媚花上有微陰水邊無近思遙憐
數觴豆何必親歌吹牧馬憶當時招延遺舊地不逢浮
沼鴈但見銜魚翠日予謬詞律答句嗟蕪累安能接賢
彥樂事聯輕騎獨不負春風塵纓此懷媿

聞學士院試含桃薦寢廟詩擬作

交交鳴谷鳥粲粲熟荆桃寢廟此先薦離宮將以遨既
同羞俎實且異獻溪毛露顯明朝日朱光逼赭袍戴經

傳自久漢令著方高天子從茲食羣臣賜亦叨

韓子華約遊園上馬後雨作遂歸

誰約玩春物狂風雲驟開擺叢多落蕊蔽路足昏埃逆
水燕迎雨將生鵝怕雷嵇康今轉嬾騎馬半塗迴

大風

夜風晝不止天理何可常正當春木榮擺磨枝葉傷東
皇務長養乃值此物狂曷不訴於帝斥之出遠方風伯
有罪五孰肯進皂囊往時歲苦旱救熱雨欲滂吹之不

使下雲雷遂深藏復搖江海波白日沉舟航又卷關塞
沙千里填河隍拔木與退鷁書傳言已詳今者天柔和
煦煦皆敷芳獨爾何不仁號怒事雄強既其背天時誅
殛固所當鳶鳴兼虎嘯助惡黨亦昌

春風

常愁春雲低誰料春風惡搖扇無定響折幹時聞落吹
花擁細草送雨來高閣江燕倚身輕逆飛前復却

送侯寺丞知鞏縣

侯洛人

伊洛合河流正臨歸鞏路崖壁人畏崩芹泥岸長固山
迴邑郭見馬入雲煙暮宰茲雖所淹況與鄉黨附

宋次道家摘寶相花歸清平里

往歲見此花開遲手擷羣芳因醉興今來須約爛熳看
及過風雨又已後主人為我特殷勤架底深深掇孤秀
密枝陰蔓不爭開薄紅細葉尖相鬪先時已落已埽除
最晚堪憐子所厚呼童歸遺不可緩金盤付與急奔驟
暮還已見映雲髻初拈尚覺香在袖官橋夜市正沽酒

沽酒共賞莫待晝

送南京僉判寇中舍

東風莫迎船船下黃流急送車猶未動顧權已不及離
宮佳氣盤賓幕平時入因君報親舊將去江南邑

送韓奉禮隨侍之許昌

岸之側多菖蒲蒲之下多乳魚乳魚可以饌菖蒲可以
道羨君調膳去且樂因使無忘寄我書

金明池遊

三月天池上都人袿服多水明
搖碧玉岸響集靈鼉画舸龍
延尾長橋寬入聲飲波苑花光粲
粲女齒笑嗟嗟行被相朋接游
肩與賤摩津樓金間采幄殿錦
文窠挈榼車傍綴歸郎馬上歌
川魚應望幸幾日翠華過

和應之還邑道中見寄

向老思舊交欲見恨無翅
前時君來都欣喜乃一至亦
既勤我懷酌酒去拘忌自從
離洛陽此會無三四謝尹
最賢豪已嗟存沒異因酬
馬上篇遂寫相逢意

送韓仲文知許州

孰不為太守所榮歸故鄉僚官詫舊識
郎吏窺新章前去別馬上今仰立道傍
野老拜車塵里人持壺漿至家
墳麓美謁龍雲日光盛事難盡書且舉國門觴

送薛殿丞知達州

遠郡古通川雲煙秀重疊江從巴蜀來
山與岷峨接啼鳥異方音青林四時葉
使君當問俗市賈皆紅頰

依韻朱學士廉叔憶潁川西湖春色寄獻尚書

晏公且將有宛邱之命

物景有先後春工無舊新追歡成杳藹寄詠苦逡巡湖
水與濠接岸亭將寺鄰豔花簾舞髻弱藻胃垂緇客奏
桓伊笛人歌柳惲蘋何嘗煩几案自得去埃塵縱語曾
忘倦從游未覺頻賦詩高壓古下筆敏如神每想魂俱
往終知夢是因廣騷常慕屈感遇亦希陳借問搗詞者
當時別乘人喜公移幕府連賞二州春

集英殿賜百官宴以雨放

春來無點雨三月始聞雷曉殿鳴簷急羣公罷食迴燕
迎風翅健馬踏霧泥開晚覺微陽透飛光上綠槐

送陳太祝歸河陽

羸馬度關去夜向河橋歸水風來何急吹裂游子衣到
家莫久留速書赴禮闈大對必有蘊時哉無闊稀

送祖擇之祕丞知海州

驥有千里足不使千里馳人有抱長才亦復不得施去
去作守長政化尚可為勿云海濱陋豈無彼黔黎事舉

訟必簡安能忘酒卮水物錯在俎臠腥應自宜胸山日
相對亦莫厭其卑蒼翠入畫戟濃澹若秀眉但向此中
樂用舍乃繫時

戊子三月二十一日殤小女稱稱三首

生汝父母喜死汝父母傷我行豈有虧汝命何不長雅
雛春滿窠蜂子夏滿房毒螫與惡噪所生遂飛揚理固
不可詰泣淚向蒼蒼

蓓蕾樹上花瑩潔昔嬰女春風不長久吹落便歸土嬌

愛命亦然蒼天不知苦慈母眼中血未乾同兩乳
高廣五寸棺埋此千歲恨至愛割難斷剛性剉以鈍淚
傷染衣帶花惜落斑嫩天地既許生生之何遽困

與用文師

師名學佛者何乃愛吾詩吾方嗟世人各各事奔馳蒼
鷹絕海至不異攫鼠鷗所趨有遠近所向皆餒飢漱水
對無語風動庭樹枝

小女稱稱塲銘

吾小女稱稱慶歷七年十月七日生至八年三月二十
一日死嗚呼鳥獸螻蟻猶有歲時之命汝不然也汝稟
氣血為人豐然哲然其目瞭然耳鼻眉口手足備好其
喜也笑不知其樂其怒也啼不知其悲動舌而未能言
無口過動股而未能行無蹈危飲乳無犯舌之禁愛惡
無有情之系若是則得天真與保和何病天之遽乎得
不推之於偶然而生偶然而化偶然而壽偶然而夭何
可必也吾將衣汝衣斂汝棺葬汝于野亦入道之常分

汝之魂其散而為大空其復託為人不可知也其質朽而為土不疑矣富貴百年者尚不免此汝又何冤瘞之日父母之情未能忘故書之塋非欲傳之久且以志其悲云銘曰

母孕而夢夢維虺蛇古占女祥夫豈其然邪復占我夢我遺我稱我名命汝平御妾媵既厲而乖胡然乎靡應
送吳冲卿學士歸蔡州

孟夏日南歸馬耳豎迎風急雨不及避斷霓明向東古

城汝水傍化俗寄我公君今去拜慶酥酪美將同

下土橋送刁景純忽大風韓子華先歸遺其小
方巾明日持還副以此詩

昨日汴水頭共餞東去人暴風吹黃沙對面不相親歸
來乘大馬誤擲小方巾平明持奴還偷樣古逼真

刁景純期水門再別以風雨不往

餞客客未去明朝當更來風雨尋船嬾車馬向

闕

帽次覺重清尊想誰開終期江上見俗禮聊損

闕

韓子華訪石昌言不遇石有詩韓邀和

闕

嘗聞載酒者去訪子雲居仍值徒御出遂令談笑闕為
黍寧乏具題鳳豈有諸一聽負荆語還想蘭相如

舟中夜聽汴河水聲

夏雨漲黃流夜鳴鄰船枕乘危冒險人不識西山餓

逢王公慥大博

駑馬不惜蹄出門莫畏泥泥中逢故友十載相乖睽但
怪蒼鬢色班班俯鐵驪少立不及語交策或東西向晚

我還舟君來訪長堤對論出處迹存沒生悲啼勿言少
壯日志意吐虹霓而今七不堪嬾又甚於嵇

寄題洪州慈濟師西軒

西軒無落暉所賴西庭竹竹間有古葉竹上有鯨綠夜
雨一洗梢朝陽似晞沐焚香愛此心自不同諸俗

送謝著作歸陳州

騏驎泥中行偶蹶未千里終當至高衢尚苦泥行恥今
歸雨濛濛嘶鳴欲何止乃念彼名駒近在清川溪他日

見騰驤駕櫪此垂耳

和石昌言學士官舍十題

病竹

水邊移得已傷根
枝葉如枯生意少
主人不使荒穢侵
遂長琅玕勝凡草

石榴花

春花開盡見深紅
夏葉始繁明淺綠
祇知結子熟秋霖
不識來時有筇竹

意以

葉如華黍實如珠移種官庭特蔥蒨但蠲病渴付相如
勿恤謗言歸馬援

石蘭

言石曾非石上生名蘭乃是蘭之類療痾炎帝與書功
紉佩楚臣空有意

萱草

人心與草不相同安有樹萱憂自釋若言憂及此能忘

乃是人心為物易

葵花

此心生不背朝日肯信衆草能藝之真似節旄思屬國
向來零落誰能持

蔬畦

手自除荒手自鉏蔥鍼已插壅薤本朝芸夕灌豈不勤
比食翦苗間且穩

水紅

江天澹澹江水平江岸有花紅作穗今日特向都城開
畫時只合銜魚翠

甘菊

世言此解制頽齡便當園蔬春競種到秋猶得泛其英
爛醉莫辭官有俸

蘭

楚澤多蘭人未辯盡以清香為比擬蕭茅杜若亦莫分
唯取芳聲籠衣美

勉致仕李祕監

淵明歸柴桑家貧食不足當其勇去時不待秫稻熟借問何以然實恥暫屈辱公嘗為近臣曾不輒媚曲一緣府舍災遂使還秩祿祿仕四十年內乏釜鍾粟歸來託四鄰恹恹無片屋去就異前人其義已介獨譬之食嗟來應自甘退縮當營負郭田漸可事水竹

送施景仁太博提點江南坑冶

楚山豈無銅楚匠豈不工大鑪常乏鑄碧井那得充積

弊在鄉縣孰肯以利籠君今承詔行諭民當得中苟能
使之發亦莫取之窮此乃事可久山深山自通

夜泊虹縣同施景仁太博河上納涼書事

與君愛清風移榻就明月月落見星跡星跡如晝熱露
衣輕露墜響岸崩湍齧坐思都城時誰許脚不襪

施景仁邀詠泗州普照王寺古檜

來尋淮上寺老檜莫知年劫火已鎔像樛枝寧改煙根
拏怪石入節駁蒼苔堅欲問浮波箭空嗟此獨傳

送王判官同提點坑冶

地雖不愛寶利在與民共務國不務民儻有安得用孟
氏美王圉其說久已誦聊此陳薄言忉怛不能重

淮雨

雨脚射淮鳴萬鏃跳點起漚魚亂目濕帆遠遠來未收
雲漏斜陽生半幅

舟次山陽呈王宗說寺丞

遠客雖有樂莫如逢故人夜懷夷門時月照楚水濱自

居扁舟上隨處與船鄰宜將到此日因使報朋親

送崔黃臣寺丞宰臨海

補官桐廬時已飽嚴陵釣進吏六百石又得臨海嶠因
之論出處足以見風調洪潮可登觀萬里漲川竅收縮
尚何歸由來人莫料憑君能賦才庶或窮其妙

楚童

楚童能捕魚乃在水邊居手取眼不顧情知獺未如鬚
上浮萍草點點綠有餘既挈不暇理歸來莫取渠

雜詩絕句十七首

自此寶應道中
起慶歷七年夏

蛙行動萍葉誤觀作游魚稍稍引兩股已變科斗書
青草生水中日日隨水長水落何所依撩亂為宿莽
有蟲託斷葑斷葑日夕流不知止息處隨天非自由
荒水浸籬根籬上蜻蜓立魚網挂遶籬野船籬外入
茸茸翦熟絲雨染臙脂暈滿樹斂黃昏槿花無此分
青青老鏡葉下有絲實尖浪頭撥船女刺手終不嫌
岸傍草樹密往往不知名其間有啼鳥似與船相迎

青蠅何處來聚集滿盤間誰知腹中物變化如循環
水上賣瓜女摘瓜陂上田長麻已不識滿把青銅錢
買魚問水客始得鯽與魴操刀欲割鱗跳怒鬚鬣張
沙頭風雨來帖水野雲黑如觀曹公營萬弩射船側
前時雙鴛鴦失雌鳴不已今更作雙來還悲舊流水
度水紅蜻蜓傍人飛款款但知隨船輕不知船去遠
塘上挽船人塘泥深及脛落日望前邨心將道塗競
燕立茅屋脊燕銜芹岸泥巢成同養子薄暮亦同棲

鵲銜高樹蟬危脇
綠車響露腹不曾肥
殺之嗟已枉
河畔有釣翁
團泥為甕
缶坐想秦人聲
思傾杜陵酒

宛陵集卷三十二

欽定四庫全書

宛陵集卷三十三

宋 梅堯臣 撰

五月二十夜夢尹師魯

昨夕夢師魯相對如平生及覺語未終恨恨傷我情去
年聞子喪旅寄誰能迎家貧兒女幼迢遞洛陽城何當
置之歸西望淚緣纓

五月二十四日過高郵三溝

甲申七月七未明至三溝先妻南陽君奄化向行舟魂

去寂無迹追之固無由此苦極天地心脅腸如抽泣盡
淚不續岸草風颼颼樹殭尚疑生大呼聲裂喉柁師為
我歎挽卒為我愁戊子夏再過感昔涕交流恐傷新人
心彊制揩雙眸未及歸旅櫬悲恨何時休

過茱萸堰

茱萸堰在吳牛死茱萸堰廢吳牛閑吳牛閑東南百貨
來如山

詠歐陽永叔文石硯屏二首

號州紫石如紫泥中有瑩白象明月黑文天畫不可窮
桂樹婆娑生意發其形方廣盈尺間造化施工常不沒
號州得之自山窟持作名卿硯傍物

鑿山侵古雲破石見寒樹分明秋月影向此石上布中
又隱孤壁紫錦藉圓素山祇與地靈暗巧不欲露乃值
人所獲裁為文室具獨立筆硯間莫使浮埃度

永叔進道堂夜話

海風驅雲來池雨打荷急虛堂開西窗晚坐涼氣入與

公話平生事不一毫及初探易之興大衍遺五十乾坤
露根源君臣排角立言史書星瑞亂止由不戢巨惡叅
大美微顯豈相襲陳疏見公忠曾無與朋執文章包元
氣天地得噓吸明吞日月光峭古崖壁澀澗論發賢聖
暗溜聞鬼泣夜闌索酒卮慢意頻舉挹未竟天已白左
右如啓蟄

贈劉謀閣副

聲名赫赫在窮塞蒼宇堂堂真丈夫腰劍臂弓輕赴敵

無人不伏魏黃鬚

長蘆江口

風駕晚潮急浪頭相趁過水歸瓜步小船下秣陵多鷗
舞不停翅燕飛輕帖波今來學楚客薄暮愛漁歌

金陵懷古

秦莫恃棧閣吳莫恃塹江不能恃以德二國竟亦降
邇來屢興廢由險輕萬邦誰知荒涼城空存如剗腔我今
經其下弔古語媿嗟哉石頭潮助怒常春撞

江畔

江畔淺蒲碧無主
吳牛夜蹶江干歸
舟人不悟月已上
花脚野蚤撩亂飛

慈姥山石崖下竹鞭

江水浸石壁峭直無鳥蹤
穴垂青竹根瘦蛇愁作龍
霹靂雨脚入濕點莓苔封
世人不得用八馬今乖慵

阻風

老魚吹浪不肯休
一夜南風打蘼響灘下輕舟未可行

山脚盤渦似車輞

慈姥磯下

蘆汀泱泱外露斂見孤嶂行舟每出觀漸近已殊狀傍
來認飲牛正去忽側盍水壑陰若春野鳥時與相且待
風色迴出口始浩蕩

早發

吳雞鳴隔山江月半在水齧齧出岸潮雲雲入浦葦解
絳泛明鏡接天知幾里我家今不遙正住句溪尾

望夫石

征骨化為塵柔肌化為石
高山共蒼蒼臨水望脈脈
青卷為髮黥月低照額
千古遺恨深終不見車軌

過碣山磯值風

山口風偏急磯頭水似煎
喧聲殊倦聽逆上正難牽
暗石誰愁礙長塗未擬前
江心看白浪卷起大於船

碣山磯上港中泊

風惡舟難進聊依浦裏邨
岸潮生蓼節灘浪聚蘆根
日

脚看看雨江心漸漸昏篙師知蟹窟屈取以助清樽

宿磯上港

夜深風浪息月正在南斗遠水生白煙疎螢出荒莽照
蟹屢熟新張魚未發筍獨能憐野客游宦意何有

謁昭亭廟

連峰到溪止澄溜向潭瀉廟道走山腰雀雛鳴屋瓦古
壁畫雲雷空庭儼輿馬眷予來故鄉潔齋陳奠笋尚想
昔卅童維愚託民社每從諸父賽竭至此祠下今齒踰

不惑雙親世似寡過此無所禱曷慕逢時者

昭亭潭上別

行舟晚解去親戚各還家淚落正濕衣腸翻如轉車借
是昭亭水相隨亦有涯予今遊宦意曾不學匏瓜

宣州環波亭

冒暑駐輪轂徘徊北壕上棟宇起中央芙蓉生四向今
吾太守樂慰此郡人望雨從昭亭來水入句溪漲蜻蜓
立欄角朱鯉吹荷浪岸木影下布水鳥時引吭心閑不

競物興適每傾釀薄暮詠醉歸陪車知幾兩

昭亭山

曰山何必高要在出雲雨昭亭非峻峰雄雄若蹲虎旱
歲一來祠霈然隨漑酤有草牧爾牛有新資爾斧有溪
出其陰有潭在其塢獸則獮與貉魚則魴與鱖山離水
羽聲下上相雜伍呼名如謙恭號叫若怒侮崖竹或節
疎嶺松或腹腐巨蜂結層房養子窟深土何事山中人
采以為市賈其容固已多其忍吾未取

汨姑熟江口邀刁景純相見

時陳州晏相公辟

尾生信女子抱柱死不疑
吾與丞相約安得不顧期
徘徊大江側念此親相知
欲留時已晚欲去情難持
引領望軒車豈能慰我思
願聞下士禮無曰屈非宜

見牧牛人隔江吹笛

朝與牛出牧晝與牛在野
日暮穿林歸長笛初在髻
面尾騎且吹音響未成雅
隨風吹遠近舉調任高下
我方江上來平溜若鏡渥
悠悠經醉耳亦足發蕭灑
苟能和

人心豈必奏韶夏鄭聲實美好蠢情如剔剔況其荒敗
迹亦又甚裂瓦南箕成簸揚寺孟詵侈哆我今留此詩
誰謂馬喻馬

依韻和歐陽永叔中秋邀許發運

看取主人無俗調風前喜御夾衣涼競邀三五最圓魄
知比尋常特地光豔曲旋教應可聽秋花雖種未能香
曾非惡少休防準衆寡而今不易當

永叔詩云仍約多
為詩準備共防梅

老敵
難當

與夏侯繹張唐民游蜀岡大明寺

秋葉已多蠹古原看更荒廢城無馬入破冢有狐藏寒
日稍清迴羣山分潞蒼田衣指白水此下是雷塘

寄麥門冬於符公院

佳人種碧草所愛凌風霜佳人昔已歿草色尚蒼蒼陸
行載以車水行載以航于今五六年與我道路長思人
不忍弃期植寒冢傍我嗟復北去安得畢此喪留植精
舍中遠挈防根傷他時京峴下不比野蒿黃

送張唐民

楚甸有行客西風一孤舟遠隨淮月上若與星槎浮野
岸蘂幽芳氣清露已秋得意美魚蟹白酒問沙頭

秋夜同永叔看月

青天有右目昏明不常開常時翳雲氣古鑑生莓苔秋
夜特清徹乃顧漸西迴靈兔不擣藥是夜無纖埃與君
玩流景置酒臨層臺單衣濕白露鳴鴈方南來以言歡
未終鴈聲一何哀

中秋不見月答永叔

天嫌物兼美而使密雲藏已向石屏見何須照席光

和永叔中秋夜會不見月酬王舍人

主人待月敞南樓淮雨西來斗變秋自有嬋娟侍賓榻
不須迢遞望刀頭池魚暗聽歌聲躍蓮的明傳酒令優
更愛西垣舊詞客共將詩興壓曹劉

觀永叔集古錄

古碑手集一千卷河北關西得最多莫怕他時費人力

他時自有錦蒙駝

觀舞

坐上作

誰憐嬌小好腰支
老大而今莫那伊
太守風流未應淺
更教多唱楚人辭

留別永叔

舊友競留連
我征時已晚
但言會合難
豈道行路遠
行路到有期
別離未即返
明當各相思
念此去且嬾

觀永叔畫真

良金美玉不可畫可畫唯應色與形除却堅明盡非
闕
世人何得重丹青

畫真來嵩

廣陵太守歐陽公令爾畫我憔悴容便傳髣髴在縑素
只欠勁直藏心骨與我貨布不肯受比之醫卜曾非庸
公今許爾此一節爾只丹青其亦逢

別後寄永叔

前日辭親淚又為別友出愁極反無言欲言詞已窒荷

公知我詩數數形美述茲道日未堙可與古為匹孟盧
張賈流其言不相昵或多窮苦語或特事豪逸而於韓
公門取之不一律乃欲存此心欲使名譽溢竊比於老
郊深媿言過實然於世道中固且異謗嫉交情有若此
始可論膠漆

登揚州北門

樓上山如澹墨畫城中水似輕藍按揚州今似乃州景
似聽中和樂職歌

因目痛有作

已為貧孟郊拚作瞎張籍詩句但口吟世事不眼歷既能分好惡難用變青白讀書聽吾兒且未廢朝夕

宿邵埭聞雨因買藹炙人迴呈永叔

秋雨鴈來急夜舟人未眠亂風燈不定暝色樹相連寒屋猛添響濕窻愁打穿明朝持藹使書此寄公前

寄許主客

昨日山光寺前雨今朝邵伯堰頭風野雲不散低侵水

魚艇無依尚蓋蓬
蕩味初能消酒渴
蓼芳猶愛照波紅
揚州有使急迴去
敢此寄聲非塞鴻

八月二十二日迴過三溝

不見沙上雙飛鳥
莫取波中比目魚
重過三溝特惆悵
西風滿眼是秋蕓

牛背雙鸚鵡

牛背雙鸚鵡
煙陂共入時
草枯行解美
日晚起羣遲
閑載寧辭遠
相鳴不聞雌
初驚牧人去
飛上野桑枝

廣陵歐陽永叔贈寒林石硯屏

磷磷石屏上濃澹樹林分
隔水見寒島暗枝藏宿雲
賢哉吾益友持以贈離羣
琥珀不須問中心多化蚊

岸貧

無能事耕穫亦不有雞豚
燒蚌曬槎沫織蓑依樹根
野蘆編作室青蔓與為門
穉子將荷葉還充犢鼻裋

邨豪

日擊收田鼓時稱大有年
爛傾新釀酒飽載下江船
女

髻銀釵滿童袍翠巒鮮里胥休借問不信有官權

晚雲

默默日脚雲斷續如破灘忽舒金翠尾始識秦女鸞又
改為連牛綴燧懷齊單伺黑密不覓額額城未剗風吹
了無物猶立船頭看

苻

苻葉光於水鉤牽入遠汀淺黃雙蛺蝶五色小蜻蜒老
死懷江女飄浮笑楚萍西風莫苦急孤蕊有餘馨

晚日

晚日晴還暖人閑見物機
葉枯蟲自裏窻響蜜蜂尋歸林
下見收柿水邊聞擣衣吾嗟久為客却媿寄荆扉

寄酬發運許主客

淮上秋來物意閑又乘輕舸信帆還
一浮一沒水中鳥更遠更昏天外山
斜幅纏跼兵吏至濃金灑紙額珠頒
欲酬已覺不能敵盡日臨風思自慙

前日

前日揚州去酒熟美蟹螯秋風淮陰來沙暖拾蚌螯不
言爾貧富只繫其鄙夷漢重二千石後世何忽之

淮陰

青環瘦鐵纜繫在淮陰城水脰多長短林枝有直橫山
蘂一足走妖鳥九頭鳴韓信祠堂古誰將胯下平

哀王孫

泗水赤龍將欲飛瘦蛟在泥雲未歸冰蘂蒼灰寒水擊
長大王孫抱飢色誰知適自下鄉來日昃可哀猶未食

孤飯白漿持與君王孫王孫何復云

沛公歌

赤帝醉提龍劍行徑草没人壯士驚白蛇斷裂不可續
神嫗哀哀夜深哭酒醒自負氣生虹從者日畏天下雄
秦皇玉輿來向東安知隱在芒碭中婦人自識雲氣從
王命艱哉豐沛公

宛陵集卷三十三

欽定四庫全書

宛陵集卷三十四

宋 梅堯臣 撰

使風

跨下橋南逆水風十幅蒲帆響若弓
淮波帶日魚鱗紅
岌岌飛上北斗中
龜山始撞人定鐘
岸草澀澀鳴秋蟲
田家屋上壺

脩蔓屋頭綴大壺
檐外垂霜乾葉猶苦
風斷根未移收
挂煙突近開兗酒具
遲賤生無所用
會有千金時

九月二日夢後寄裴如晦

裴生安健否試聞鴈經過處士賦鸚鵡將軍養駱駝食
魚今飽未索米奈貧何昨夜分明夢持書認篆窠

昭信淮上

清淮渺然去白浪勢如奔同發已先遠獨行將向昏洲
長寧辨路夜泊偶依邨燈火稍覺亂應聞人語喧

小邨

淮闊洲多忽有邨棘籬疎敗漫為門寒雞得食自呼伴

老叟無衣猶抱孫野艇鳥翹唯斷纜枯桑水齧只危根
嗟哉生計一如此謬入王民版籍論

難知

自古難知不遇人朝為蛇鼠暮龍鱗魏齊客溺箬中死
亭長妻輕胯下貧白石夜歌誰與進黃金懷印自能伸
丈夫只患無才業何恨區區逐路塵

九山

我經九山問野叟崔嵬一無安曰九且恐斷岸積瓊玖

復意陂原多產韭又疑堆龍若柱灸四者未悟叟不言
使我臨流獨搔首

淮岸

秋水刷土骨峭瘦如老石虛沙歸島嶼寒浪漱竅隙下
過白魚尾上有蒼獺迹平岡自相連野籜鳴風櫟

原有禽倏鳴升遽默下

小禽不盈握羽翮自輕捷裊裊上雲鳴聲窮如隕葉雀
懷啄粟娛鷄有棲蒿愜嗟嗟力甚微枉與鷹鷂接

浮來山

舊說此山
產雲母

秦鬼驅卯沙聚結無蒼翠誰云海上移能與潮浮至洞
噓蛟鼉腥廟畫風雷異雲母今有無庶為仙藥餌

泊下黃溪

黃溪晚來泊得見田家微刺艇斜陽下耕洲載未歸牛
鳴向空犢犬喜入人衣復有返樵者檐枯翹雉肥

濠梁感懷

天子昔封禪吾叔從金輿回首泰山下出建雙隼旗來

尋觀魚臺遂遠承明廬當時十五詠螢照墨石書

渦口

秋水見灘底淺沙交浪痕白魚跳處急宿鴈下時昏帶
月入渦尾落帆防石根清淮行未盡明日又前邨

夢同諸公餞仲文夢中坐上作

已許郊間陳祖席少停車馬莫催行劉郎休恨三千里
樽酒十分聽我傾

過塗荊二山遇暗石

淮流兩山間勢束秋漲急聚石如伏兵斂斂波下立輕
舟不可防而況昧所習暗值施已毀後者戒前及同發
去漸遙更愁寒難澀

舟上采菊

泯泯平慢流行當季秋月演漾過汀洲汀洲芳杜歇白
露夜正霏黃菊寒更發采以泛酒卮不獨映華髮

朝暮

氣候輒未定寒暄朝暮間挾纊水風生衣綌川陽還綠

草藏邃岸枯櫟植高山且非天時異順理心自閑

荆山

和楚人茲楚地泣玉山無所記但見楚人誇產玉古廟
幽幽無鬼哭儻有鬼定無足

塗山

古傳神禹迹今向舊山阿莫問辛壬娶從來甲子多夜
淮低激射朝江上嵯峨荒廟立泥骨巖頭風雨過

曉日

出舟曉日升瞳矓波上爛爛黃金鎔
羃歷紫煙生鏡中
釣船似畫分橫縱風莫從虎雲從龍
變作霏霞重復重

雞聲

雞聲踏曉呼呼起扶桑烏含光如車輪碾雲蹤迹無誰
教夸父逐遠向鄧林趨復從海底轉循環似轆轤

采杞

誰謂岸無杞條其長矣誰謂杞無實爛其皇矣掇彼征
矣檐既盈矣捨棘與蠹造此宜酒維此宜酒我挹我注

我飲我助以養我籲

泊楸澗觀渡

隔岸呼舟楫臨河立馬牛解鞍沙上憩沉網渚間收殘
日銜沙尾孤帆落戍頭莫愁暄作雨晚水白煙浮

看山寄宋中道

前山不礙遠斷處吐尖碧研青點無光澹墨近有迹前
林橫白雲復與後嶺隔孤舟川上人引望不知夕安得
老畫師寫寄幽懷客

暮雨

水上魚吹白露山頭雲與龍附潭中水作潭中雨朱鼈
飛過吳洲去鯉魚相隨不知數老蛤銜泥在深處

細雨樵行

鮫人困卧寒潭底怙波濛濛垂白綃波上女兒飛輕橈
逆流自與郎去樵風吹鬢髮不及撩雅翅卷起蠶尾翹
儂纈羅帶長繞腰日暮下來吹短簫

晨雅

雲昏月黑雅不知鼓聲鼕鼕雞報啼睥睨未辨天東西
癡雛噪舞羣翅低野桑葉卷風淒淒濃霧不起寒雨迷
晨雅却歸巢上棲

會稽婦

食鵝莫問濁水泥嫁壻莫問寒家兒寒兒顰黑面無脂
驢子縱瘦骨骼奇買臣貧賤妻生離行歌負薪何媿之
高車來駕建朱旗銅牙文弩擐犀皮官迎吏走萬馬蹄
江湖晝起橫白霓舊妻呼載後乘歸悔淚夜落無聲啼

吳酒雖美吳魚肥
儂今豢養慙豬雞
園中高樹多曲枝
一日挂與桑蟲齊

九日次壽州

昔人把菊望青盃
今我持酒無黃花
自催屋裏紅鱗膾
不彈牆頭白項雅
壽春城高枕淮水
綠蒲疎疎暮帆起
登臨不學孟叅軍
帽墜山風費嘲紙

泊壽春龍潭上夜半黑風破一舟

盲風吼空來不識
前山遮迴激入灣
口暗浪騰水涯喧

聞破我船沈沒驚一家晦昧若塗漆心緒如亂麻燈光
不出戶鬼火空照沙百物任飄蕩薄命誰怨嗟但存此
空舟坐類鳥寄槎妻孥皆失色一夕鬢欲華遭惶俟天
明頃刻抵歲遐雨寒雞唱遲況乃城上雅

穎上得鯉魚為繪懷餘姚謝師厚

青蓑潭上老蘋尾網中魚買作秋盤膾還思遠客書越
齋橙熟久楚飯稻春初雖去故鄉遠不嫌為饌疎

邱家渡早發

曲穎若秋蛇屈盤鱗甲活問成得耕人拾魚逢祭獺草
窠殘野燒樹挂經流沫百里相對看頻行媿迂闊

水次蘚花

秋雨日霏霏碧花生疊疊水邊有神女妝去遺翠靨岸
側小家婦不知所宜慙未得未還人自將渾面帖

夜行憶山中

青熒鬼火動不悟前山雨昏徑梟鳥鳴獨行毛髮聚
葉枯綴林風動疑有虎低迷薄雲開心喜澹月吐

邨醪

雨濕破荆籬風搖樹亞旗
小槽聲不急挈榼問沽遲
摘果野棠熟望人船火隨
燈前相對飲還似昔過時

川上田家

斜光隔河明入照桑柘下
皋龍生麥苗青青尚堪把
遠見牛羊歸相親童稚野
醉歌秋草間頗與世家寡

發勻陵

秋雨密無迹濛濛在一川
孤邨望漸遠去鳥飛已先
向

晚雲漏日微光人倚船安知偶自適落岸逢沙泉

聞鴈

濕雲夜不散薄處微有星孤鴈去何急一聲愁更聽心
應失舊侶翅已高青冥幾日江海上鳬鷗共滿汀

牽船人

沙洲折脚鴈疑人鋪翅行奈何暮雨來復值寒風生濕
毛淅泥滓縮頸無鳴聲爾輩正若此猶勝被堅兵

田人夜歸

田收野更迴墟里隔煙陂荒徑已風急獨行唯犬隨荆扉候不掩穉子望先知自是一生樂何須閭井為

行次潁州聞張甥宗亮不捷鄉薦以詩唁而迎之

關

陰道雨冷江南書始歎與意異何慙定鑑疎但玉切莫道黔驢不負當時約馳迎一乘車

聞櫓

舟下中流聞櫓聲隔窻燈已暗卷幔月微明漸

遠遙應宿枕驚客心何苦急曾是不緣名

鷗

陽鷗鳥雙飛去雙飛如有歸並宿向何處汀
永落沙沮洳不避近行舟應知心寡慮

晴

盡朝日吐清光萬里不礙日衆鳥欣哢吭草
山川尚鬱蒼百事擇佳日佳日唯晴陽
次項城阻風舟不能進

風急輕舟晚不前
因來泊古渡聊且上平田
草穩鶉驚去瞥然
却尋孤岸遠吹幘亂華顛

斫膾懷永叔

高河古穴深下有蒼鱗
鯽出水獐將飛落刀細可織香
杭炊正滑白酒美少力但欠平生歡
共此中路食

夜漁

夜漁歸自速短艇若飛雲
水動月猶白欸音人不聞迴
身明燭底撫卷至宵分
我以此為足勞勞非爾羣

驚鳬

驚鳬雖避人終戀舊所泊盡背船頭去却從船尾落須
知取勢高不是初飛錯

十月三日相公花下小飲賦四題

拒霜

木杪芙蓉花開非紅豔早常畏晚霜寒朱華競衰草

九月二十八日牡丹

香色已向青春發又見秋深特地開應笑菊殘無意思

不能邀賦洛陽才

殘菊

零落黃金蕊雖枯不改香深叢隱孤秀猶得奉清觴

三日讌集

蕭然寒圃有殘芳吟遍朱欄向夕陽既許坐陪公衮
翬却慙蒿羽接鸞皇

依韻許主客北樓夜會

一月能逢幾笑歡高樓紅蠟滴金盤吟餘隴首雲初散

唱盡陽關露已寒
不管星河漸西落
自將煙水去程寬
當時坐客各南北
誰憶重遊泛木蘭

謹和相國屋上菊叢

屋上有叢菊結根深
瓦縫既無地勢美又乏土力擁
乃因塗明生不由人所種
亦能應節開焉取入公用公來
步廣庭聞鴈目始縱忽見粲然英
降植合常從賓僚席其傍
詠玩意已重物莫厭僻遠會遇良可頌

寒菜

畦蔬收莫晚圃吏已能供根脆土將凍葉萎霜漸濃不
應虛七箸還得間庖饗旨蓄詩人詠從來用禦冬

送裴節推歸京

遠水未生凍輕舟歸大梁岸迴初向月篙滑始霑霜清
世豈淹俊上公存薦章行應重對策莫媿漢賢良

十月菊上蜂

黃蜂得晴日不道菊開稀向蕊晚寒起落叢無力飛輕
輕難自舉怙怙一何微莫問巢房處斜陽奈欲歸

送江學士睦州通判

涉淮淮水淺沂溪溪水遲君到桐廬日正值米茶時試
問嚴陵迹今復有誰知

和民樂

歲晚場功畢野老相經過有酒自斟酌適意同笑歌大
兒緝牛衣小兒護雞窠困廩見餘積息戍靡負戈林間
落熟果屋裏鳴寒梭會待朔雪時狐兔生且闕飫鮮持
作腊贈乏不言他是非了莫問此理當如何

和晚花

春花莫厭早秋草莫厭遲各不相羨慕榮枯乃繫時笑
蓉東籬英雖晚亦自宜霜前給給開霜後差差萎深處
有孤萼寒月尚見披野蜂徒愛香凍翼不能支抱枝無
力去憫然見恩私

聞進士販茶

自此宣州至和
二年五月後

山園茶盛四五月江南竊販如豺狼頑凶少壯冒嶺險
夜行作隊如刀槍浮浪書生亦貪利史笥經箱為盜囊

津頭吏卒雖捕獲官司直惜儒衣裳却來城中談孔孟
言語便欲非堯湯三日夏雨刺昏墊五日炎熱譏旱傷
百端得錢事酒肉屋裏餓婦無餽糧一身溝壑乃自取
將相賢科何爾當

梅雨

三日雨不止蚯蚓上我堂濕菌生枯籬潤氣醖素裳東
池蝦蟆兒無限相跳梁野草侵花園忽與欄干長門前
無車馬苔色何蒼蒼屋後昭亭山又被雲蔽藏四向不

可往靜坐唯一牀寂然忘外慮微誦黃庭章妻子笑我
閑曷不自舉觴已勝伯倫婦一醉猶在傍

烏毀燕巢

堂間兩胡燕哺雛銜百蟲老雅亦養子偷雛燕巢中燕
巢忽墮地六七皆命窮赤身無羽翼腸斷彼雌雄來往
徒鳴聲安得置室宮我閔樓窠窠數俄已強雨風從今更
生卵不若受女娥

五月十三日大水

誰知山中水忽向舍外流誰知門前路已通溪中舟窮
蛇上竹枝聚蚓登堦陬我家地勢高四顧如湖澎湃萍
穿籬眼斷葑過屋頭官吏救市橋停車當市樓應念此
中居望不辯馬牛危湍瀉天河漫漫無汀洲羣蛙正得
時日夜鳴不休戢戢後池魚隨波去難留揚鬢雖自在
江上多網鉤紛紜閭里兒踴躍竟學泅吾慕孔宣父有
意乘桴浮



宛陵集卷三十四

欽定四庫全書

集部

宛陵集卷三十五
七

詳校官庶吉士

臣張溥

檢討臣何思鈞覆勘

覆校官博士

臣劉光第

校對官主簿

臣汪日贊

謄錄舉人

臣張光熙

欽定四庫全書

宛陵集卷三十五

宋 梅堯臣 撰

依韻和正仲賦楊兵部吳興五題

雨過見虹明長橋欲映城
窻間晴氣入空際晝涼生
有扇徒看畫無冰自覺清
人知太守姓不減漢公名

清風樓

在昔有佳句故人如遠來
競生吳客社不上楚王臺
稍拂清樽動時吹翠帶開
長安在何處水鳥望中迴

明月樓

雲雲前溪白蒼蒼後嶺巍人疑查上客星合蚌中暉影
轉欄干迴杯行漏鼓稀只知誇粉黛不向桂邊歸

碧瀾堂

虛雲臨滉漾橋勢對隆穹環珮佳人去汀洲翠帶空橘
船過砌下蘭棟起雲中欲問芳菲地吳王一廢宮

逍遙堂

江東有賢守好客似春申自構杏梁地不生珠履塵樂

章思季子後俊得吳均寢卧在其下知君學至人

依韻和行之都官芭蕉詩

看取有心常不展亦如隨分圻佳葩無端大葉映蓮幕
却笑菖蒲罕見花

促織

札札草間鳴促促機上聲織女夜中起明河檐外橫一
絲不入杼疎密工未精豈知天孫巧衣脫六銖輕人間
唯賚重暗蟲休催成

吳仲庶殿院寄示與呂冲之馬仲涂唱和詩六
篇邀余次韻焉

次韻被命出城共汎

三總忽出乘楚艘直氣突兀如吳濤大都智勇皆世豪
橫身破浪親戰舫迴舷受箭誰畏曹猛士心伏寒生毛
風聲鶴唳傳九臯何用寶刀稱孟勞右持酒杯左持螯
功成各慕前人高不言大享烹太牢下與尺鷃翔於蒿

依韻游陳留禪寺後池

共逢香刹住萬景筆頭堆池水蛟龍盡汀洲鴈鴟來遠
游情莫落去國意徘徊舟子休敲鼓王程不爾催

次韻晚泊睢陽

日下繡衣客江南燕尾艍迹雖同鷁退心不假犀涼舊
國旌旄去包原苑囿荒臨隄一懷古柳上見微陽

汴渠

我竇山野人不識經濟宜聞歌汴渠勞謾綴汴渠詩汴
水源本清隨分黃河枝濁流方已盛清派不可推天王

居大梁龍舉雲必隨設無通舟航百貨當陸馳人肩牛
騾驢定應無完皮苟欲東南蘇要省聚斂為兵衛詎能
削乃須雄京師今來雖太平盡罷未是時願循祖宗規
勿益羣息之譬竭兩川賦豈由此水施縱有三峽下率
皆麤冗資慎莫尤汴渠非渠取膏脂

次韻臨淮感事

楚舸高帆未可開滿帆風暴作陰雷聖文疊疊傷漂溺
世路紛紛自往來浮磬猶聞傳激越沈妖不見鎖淵回

連陂畫黿鳴無數安得周官為灑灰

次韻夜過新開湖憶二御共泛

出舟湖渺渺月白絕纖氛已見水如鑑莫生波上雲獨
征何慕侶冷酌不知醺露下清吟久同心本愛君

荅宣城張主簿遺雅山茶次其韻

昔觀唐人詩喜詠雅山茶雅銜茶子生遂同山名雅重
以初槍旗采之穿煙霞江南雖盛產處處無此茶纖嫩
如雀舌煎烹比露芽競收青弱焙不重漉酒紗顧渚亦

頗近蒙頂來以遐雙井鷹掇爪建溪春剝葩日鑄弄香
美天目猶稻麻吳人與越人各各相鬪夸傳買費金帛
愛貪無夷華甘苦不一致精麤還差有差至珍非賚多為
贈勿言些如何煩縣僚忽遺及我家雪貯雙砂罌詩琢
無玉瑕文字搜怪奇難於抱長蛇明珠滿紙上剩畜不
為奢玩久手生胝窺久眼生花嘗聞茗消肉應亦可破
瘕飲吸氣覺清賞重嘆復嗟嗟既不足吟誦又豈加
我今實彊為君莫笑我邪

送寧國軍宰崔寺丞移臨安

六月畏嶺險乃陟川程迂遙看雲中鴈不亂江上鳬魚
網離飛鴻我邑望何殊鱗方懷其剖鳥反值以剗為言
等王民豈限楚與吳是維見戀慕作詩贈路隅

辨疑贈獻甫

一客逢吠狗無箠制狗狂一客叱狗吠一客言狗良良
狗豈妄吠好言已莫詳言乃仁之趨叱乃義所當趨仁
不顧義非是助狗猖吾今不疑仁仁義嗟何妨

盜儒

其衣乃儒服其說乃墨夷天生物一本今爾二本為爾
忍不葬親委以飽狐狸吾心則孟子不聽爾矢辭

宣城宰郭仲文遺林檎

右軍好佳果墨帖求林檎君今忽持贈知有逸少心密
枝傳應遠朱頰映已深不愁炎暑劇幸同玉漿斟

自和

陶公種五柳華氏戲五禽達性與養生共得古人心佳

果能御暑致之意何深河朔存故事助飲莫憚斟

送王克憲奉職之彭澤

折柳贈子行况聞彭澤去將過五株下可與青青助渭
城人唱罷羌管愁吹處江上定多閑疎陰就箕踞

寄潘歙州伯恭

我貧性愛酒有酒無錢沽新安走牙兵六月至我廬手
中持尺題肩上擔瓦壺高山度青天救此愁腸枯開之
聊傾樽渴肺如澆酥醉來欲學李白騎鯨魚又思阮籍

跨蹇驢上溪無健鱗下嶺無壯駒憶君南望空長吁

再寄歙州潘伯恭

青山截天去古路蔽雲中不有行人至安知與郡通
高樓雖窈窕遠樹已溟濛今日勞君問衙門一老翁

依韻和永叔澄心堂紙荅劉原甫

退之昔負天下才埽掩衆說猶除埃張籍盧仝鬪新怪
最稱東野為奇瑰當時辭人固不少漫費紙札磨松煤
歐陽今與韓相似海水浩浩山鬼鬼石君蘇君比盧籍

以我擬郊嗟困推公之此心實扶助更復有力誰論哉
禁林晚入接俊彥一出古紙還相哀曼卿子美人不識
昔嘗吟唱同樽罍因之作詩荅原甫文字駛穩如刀裁
怪其有紙不寄我如此出語亦善詆往年公贈兩大軸
于今愛惜不輒開是時有詩述本末值公再入居蘭臺
崇文庫書作總目未暇綴韻酬草萊前者京師競分買
罄竭舊府歸鄒枚自慙把筆粗成字安可遠與鍾王陪
文高墨妙公第一宜用此紙傳將來

依韻酬永叔示余銀杏

去年我何有鴨脚贈遠人人將比鵝毛
賚多不賚珍雖少未為賚亦以知我貧
至交不變舊佳果幸及新窮坑我易滿
分餉猶奉親計料失廣大瑣屑且沈淪
何用報珠玉千里來慇懃

依韻酬永叔再示

前歲守廩京城西有如勾踐巢會稽
引杯嘗膽未雪恥怒蛙起揖當涔蹄
海天白日蔽光影霹靂一過收雲霓

九臯澄明鶴翅濕欲暮刷羽聲嘶嘶客來東方美鬚鬣
夜光出袖行無迷授子照眼已希世自顧臭裀猶浮齋
文章製作比善塑物象變怪一以泥泥雖各用有巧拙
巧之高絕非由梯又聞東夷蹈水底騎頸直踞通天犀
曼卿子美樓入室似使二嫂治朕棲舜歸在牀不可得
此實素分非能齊而今我獨向田里秋稼已熟煮黃雞
自傾白酒坐溪上誰念往日無梁梯鄰邦或有寄嘉釀
瓦甕土缶盛玻瓈昨喜得書書滿紙官尊職大憐我睽

怪我書亂苦簡略疲驚豈敢攀駘驪賤交情古來有
胃中不欲置畛畦世間百事厭著意但願無病年壽躋
田園未多亦粗給兒女況足資提攜終當去問綿上叟
自與野老月下犁

池州蕭相樓

復所建

樓中九華峰天削水蒼玉公主何參差來雲自聯續我
思唐蕭家八人居宰錄

瑞嵩華復
倦傲真遺

朱欄幾廢興下視寒

江曲吳侯來為邦百事無窘束新之以登臨風月詠玩

足安得黃鵠翼一舉遺世俗

雜興

苦棟樹青鵲鵠啄鹽土鳴鳴鳴老雅銜巢子爭噪落嶺
隅不覺茶滿山漁利入江湖鹽由鵲鵠起茶由老雅趨
誘以觸禁網二鳥誰與誅

東家月吐明西家犬爭吠玉兔在中天曾何競窺櫺
娥雖夜行莫比淫奔廢呶呶籬下音胡不鈴其喙

夢後寄歐陽永叔

不趁常參久安眠向舊溪五更千里夢殘月一城雞適
往言猶是浮生理可齊山王今已覺肯聽竹禽啼

送王著作赴西京壽安

翔向

去作西畿令當趨大尹庭閑尋前代迹淨埽古槐廳未
慣餐周粟還應憶楚萍但逢花木處知我昔常經

答了素上人用其韻

予心每澹泊世路多變詐梟鳴與鵬怪何用思彈射空
山雖夜行猛虎終不怕功名未逢時壯士且出胯七尺

無競軀市人應亦訝有香知害身投膺見窮麝一朝珠
出淵百金未酬價爾尋遠公去挈盃廬峰下我趨仁義
急不解如陶謝

送通判黃國博入浙

西風半空鳴且號吳天點破吳鴻高東溪車馬走送客
白露衰蘭輕若毛客當西歸乃東去為何欲及八月十
五夜觀洪濤洗蕩生前邑邑不平氣付與滄海之水隨
滔滔却來廣陵願相見拍手大笑傾新醪一飲一石無

一錢莫管寒近脫弊袍脫袍準酒不惜醉天意未必凍
我曹

烏啄棗

樹頭陽烏飢啄棗破紅遶地青蠅老青蠅雨濕驚不飛
殘棗入泥人不埽西風落盡鳥亦歸晉客齒黃終懊惱
真上人因送毛令傷足復傷冷二首

陶令歸時遠公送石苔秋雨步遲遲凌霄花在古松上
也笑向人人不知

聞道山中出入稀，偶來溪上坐談微。
野雲不管田袍薄，寒逼瘦膚相伴歸。

潘歙州怪予遊行與黃君同路，黃先游浙矣，依韻酬寄。

未識潘岳貌，已知潘岳名。去年改藩屏，暫此解佩纓。
一見意已合，談笑僕屢更。豈唯文學富，況亦論事精。
溪邊昔欲罷，屑屑秋雨零。于今又聞蟬重起，悲涼情作詩遠。
見招，值我將西行，譬彼矯翼鳥，革然顧侶鳴。蒼山不可

陟空入江上舸黃君雖云約同泛明日自訪柳惲汀寒
儒所向多不成或西或東車馬驚高樓登望酸目睛欲
觀弄濤仍瞻鯨新安太守空相迎舉手謝君江水清

潘歙州寄紙三百番石硯一枚

永叔新詩笑原父不將澄心紙寄予澄心紙出新安郡
臘月敲冰滑有餘潘侯不獨能致紙羅紋細硯鐫龍尾
墨花磨碧涵鼠鬚玉方舞盤蛇與虺其紙如彼硯如此
窮儒有之應瞰鬼

八月七日始見白髭一莖

昔見白髭驚今見白髭喜人將拔去之我獨不然耳拔之既更生留之何所恥白日儻日拔日拔詎能已黑壯不為髻白衰不為鄙道德保於中任從髭髮齒

送僧了素游廬山

平生愛廬山夢寢不可去江上饒賈船偶來看已飫釋子言南游徘徊瞻瀑布月飛金鬣斗光展千尺素嫦娥呼織女機杼勿復措必虞山鬼笑皎潔無纖汙爾若見

遠公贈之為坐具

宛陵集卷三十五